



**JUDICIAL SYSTEM MONITORING PROGRAMME  
PROGRAMA DE MONITORIZAÇÃO DO SISTEMA JUDICIAL**

***Komunikadu Imprensa***

Periodu : Novembru 2010

Pubikasaun : Novembru 2010

**Governu atende urjente pedidu husi Parlamentu Nasionál relaciona ho kestaun  
Elektrisidade iha Óspital Nasionál**

Iha plenária Parlamentu Nasionál loron 16 Novembru 2010, deputada Sra. Ilda Maria da Conceição husi bankada Fretilin, foti kesatun konabá eletrisidade ne'ebé mate hela deit iha Óspital Nasionál Guido Valadares. Husi informasaun ida ne'e, Prezidente Parlamentu Nasionál Dr. Fernando Lasama de Araújo, halo kontaktu urjente ba Sua Exelénsia Primeiru Ministru, no iha tempu oras ida nian laran ekipa téknika sira hodi kedas jerador ida bá Óspital Nasionál Guido Valadares. Jerador ne'e, atu uza bá sala operasaun no ICU (*Intensive Care Unit*) nian.

Luis Oliveira, Diretór JSMP haktuir katak mesmu lamenta nafatin ho situasaun kona-ba ahi- eletrisidade kontinua mate to'o ohin loron no preukupa ema hotu nia moris, maibe sente haksolok tanbá governu bele atende nesidade situasaun partikular no emerjensia povu nian, liu-liu kazu ne'ebé akontese iha Óspital Nasionál nian.

Tuir observasaun JSMP liu husi Projeitu Observasaun ba Parlamentu nian, nota katak asuntu ahi lakan mate sai preukupasaun boot ba povu no entidades tomak iha nasaun ne'e inklui deputadus Parlamentu Nasionál sira. Maske nune'e, asuntu ne'e seidauk hetan solusaun to'o loron ohin.

JSMP hein katak kooperasaun sira hanesan ne'e iha futuru mai bele lao diak liu tan iha seitór hotu-hotu, hodi nune'e povu nia nesidade basiku sira ne'ebé mak persija tebes Estadu nia ajudu, bele hetan informasaun no rekomendasaun diak husi membrus Parlamentu Nasionál nian liu husi fiskalizasaun, hanesan konsagra ona iha artigu 92 Konstituisaun Repúblika Demokrátika Timor Leste.

Deputada Ilda ne'ebé halo nia intervensaun iha sesaun *informasaun diversas* nian ne'e hateten katak, eletrisidade ne'ebé mate hela deit iha Óspital Nasionál, fo impaktu makaas ba servisu médiku sira nian. Nia salenta liu tan, "*imajina deit se eletrisidade mate iha oras rua ou tolu nia laran, mate hira mak la dudu sai husi Óspital nia laran*". Informasaun ida ne'e nia hetan direktamente husi Óspital Nasionál Guido Valadares, liu husi paciente sira ne'ebé mak halo hela tratamentu saude iha ne'ebá, no husi médiku sira.

Deputada ne'e mos akresenta liu tan, Parlamentu Nasionál aprova osan barak bá parte saude nian, tanbá parte ne'e importante tebes, maibé iha realidade jeradores ne'ebé atu suporta servisu médiku sira nian deit mos laiha.

Situasaun Óspital nian ne'e, deputada Sra. Ilda foti ona iha semana rua liu bá, maibé meza Parlamentu nian la toma konsiderasaun bá asuntu hirak ne'e. Tanbá ne'e nia ezije dala ida tan bá meza, atu tau atensaun bá problema ida ne'e. Hatan bá ne'e Prezidente Parlamentu halo kontaktu urjente, no hetan reposta positivu husi parte Governu nian.

Atu hetan informasaun kle'an favor kontaktu:

Luis de Oliveira Sampaio

Direitor Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Landline: 3323883